

Bekalan elektrik terputus antara faktor gangguan bekalan air

Asrol Awang
am@hmetro.com.my



Kuantan: Bekalan elektrik terputus antara faktor berlaku gangguan bekalan air di beberapa kawasan di Muadzam Shah dan Keratong di Rompin sebelum dan selepas Aidilfitri.

Pengerusi Jawatankuasa Kerja Raya, Pengangkutan dan Kesihatan Pahang, Razali Kassim, berkata ketika ini, bekalan air akan beransur pulih mengikut kawasan yang terbabit.

Katanya, masalah bekalan elektrik yang terputus sudah diatasi dan kini beberapa loji rawatan air (LRA) kembali beroperasi seperti biasa.

"Kita jangkakan gangguan bekalan air ini akan pulih sepenuhnya minggu ini," katanya ketika dihubungi, hari ini.

Difahamkan, Pengurusan Air Pahang Berhad (PAIP) menyediakan tangki statik dan lori tangki untuk kemudahan kepada pengguna yang berdepan gangguan bekalan air itu.

Sementara itu, menerusi hantaran Facebook rasmi PAIP, insiden luar jangka itu segera ditangani menerusi Pelan Kesiapsiagaan PAIP dengan kerjasama Tenaga Nasional Berhad (TNB).

"TNB segera bertindak membaik pulih sistem bekalan elektrik ke LRA kembali seperti sedia kala seterusnya sistem rawatan air dapat dijalankan," katanya.

Disiarkan pada: April 12, 2024 @ 4:17pm